

ALDERDI ABERTZALEAK 15.000 LAGUN BILDU ZITUEN ATZO ETA PSG-RI ESKUA LUZATU ZION

BNG Gobernura heltzeko prest azaldu da Galiziaren Egunean

■ BNG alderdi abertzaleak Galiziako Gobernura iristeko asmoa duela esan zuen atzo Santiagon Galiziaren Egunean. Urrian izango dira hango hauteskundeak, eta BNGk programaren laburpenak zabaldu zituen. Beste alderdiek ere ekitaldiak egin zituzten.

Agentziak / Santiago

BLOKE NAZIONALISTA GALEGO (BNG) alderdi abertzaleko kideak, ohi bezala, Quintana plazan bildu ziren atzo, eta Galiziaren Egunean ekitaldi horretan jende ugari elkartu zen: 15.000 lagun. Urrian izango dira Galiziako hauteskundeak, eta hori dela kausa, BNGk hauteskundeetako programaren laburpenak zabaldu zituen Santiagoko kaleetan. Programa horren arabera, alderdi abertzale hori da «Galiziak gaur egun duen egoeraren alternatiba bakarra». Xose Manuel Beiras liderrak ez zuen hitz egin BNGko botoemaleentzat soilik, «galiziar guztientzat» baizik, «eta galiziar guztien presidente» izan nahi duela aipatu zuen. «Goberna dezagun oraintxe bertan, prest gaude eta. Gure programa imajinazioz beterikoa da, eta ausarta. Eta gobernatzen baldin badugu, betiere eskua luzatuko diegu gure programarekin kolaboratu nahi dutenei, nahiz eta horiek beraiek [PSGkoengatik ari zen] min eman diguten azkenaldian».

Beste alderdiei dagokienez, Esquerda Galegak ere manifestazio bat egin zuen. PSGko agintariak, berriz, Vigon izan ziren, eta



Bloke Nazionalista Galegoko manifestariak atzo Santiagoko Quintana enparantzan. 15.000 lagun bildu ziren guztira.

LAVANDEIRA / EFE

Heraclio Botana sindikalista zenari omenaldia egin zioten. PPkoak Santiagoko katedralean izan ziren urteroko mezan. Bete-bete eginda zegoen katedrala, eta han ziren Manuel Fraga Galiziako Gobernuako presidentea (PP), Jose Manuel Romay Espainiako Gobernuako Osasun eta Kontsumo ministroa (PP) eta Santiagoko Udaleko alkatea eta zinegotziak.

Haien artean zen, halaber, Elena Espainiako infanta.

BNGk gora egingo du, inkesta baten arabera • Atzo *La Voz de Galicia* egunkariak argitaratutako inkesta baten arabera, PPk gehiengo osoari eutsiko dio urriko hauteskunde autonomikoei. Hala ere, hiru diputatu galduko ditu, 43tik 40 jaitsiko baita.

BNG alderdi abertzaleak egingo du gora gehien, beste bi diputatu lortuko baititu. 13 diputatutik 15era pasatuko omen da. Dena den, inkestaren arabera hirugarrena izango da BNG, zeren eta PSG, Esquerda Unida eta Os Verdes alderdi ezkertiarrek osatutako hirukoak 19 diputatu lortuko baititu, gaur egun baino bat gehiago. X

PSOE:

«Gobernuak komunikabideak kontrolatzeko beste urrats bat egin du»

■ Herenegun gauean lortu zuten akordioa Telefonikak eta Antena 3 telebista kateak

Efe / Madril

HERENEGUN GAUEAN lortu zuten akordioa Telefonikak eta Antena 3 telebista kate pribatuak. Horrela, konpainia telefonikoak telebista kateko akzioen %25 erosi ditu. Esaten dutenez, ordea, Telefonikak benetan % 43,7 akzio kontrolatzen ditu orain.

Horrek guztiak haserrea piztu du PSOEen. Atzo Alfredo Perez Rubalcaba Komunikabideetako idazkaria mintzatu zen operazio horren kontra. «Gobernuak komunikabideak kontrolatzeko beste urrats bat egin du. Lehen Antena 3 ez zen bere aldeko komunikabidea, eta Gobernuak egin duena da bertan sartu, Telefonikaren bitartez. Hortaz, Telefonica politikoki erabili du», esan zuen atzo Perez Rubalcabak. X

Sanchez GRAPOko preso ohiari diligentziak ireki dizkio Fiskaltzak

Efe / Sevilla

SEVILLA-KO Fiskaltzak diligentzia informatiboak ireki dizkio Jose Maria Sanchez Casas GRAPOko preso ohiari, hark lehengo igandean kartzelatik irten ondotik egindako adierazpenengatik. «Injustiziak dauden bitartean, eskuan armak ditudala borrokan jarraituko dut», esan zuen Sanchez Casasek orduan, eta Fiskaltzak adierazpen horiekin justu zer esan nahi zuen galdetuko dio abuztuaren erdialdera.

Sanchez Casasek esan du ez duela epaitegira azaltzeko asmorik, ez omen du-eta zertan azalpenak eman. X

Bernard Tapie espetxetik irten zen atzo

■ Baldintzapeko askatasunean atera da, 'VA-OM auziko' zigorraren erdia baino gehiago bete ostean

Allande Sokarros / Baiona

BERNARD TAPIE negozio-gizon eta politikari ohi Luynesko (Bouches-du-Rhone) espetxetik irten zen atzo goizean, baldintzapeko askatasuna lortu eta gero. Zortzi hilabeteko kartzela zigorrera kondenatu zuten erositako VA-OM futbol partidaren auzian, eta legearen arabera gatziguaren

erdia bete eta gero aske egoteko eskubidea zeukan. Bost hilabete eman ditu giltzapean, otsailaren 3az geroztik preso baitzen. Aska zezaten eginiko azken eskaera asteartean egin zuten haren abokatuek, eta Aix-en-Provenceko dei auzitegiko akusazio ganbarak baietza eman zuen atzo. Aurretik ere baldintzapeko askatasuna jaso zuen, baina denbora gutxiz

egon zen libre, beste epaiketa batengatik giltzapean jarri baitzuten.

Alabaina, Bernard Tapien, ziur aski, presondegiko bidea hartu beharko du berriro ere, beste bi auzitan bete beharreko kartzela zigor kondenak jaso baititu. *Phoebe* laketa itsasontziaren iruzur aferan, sei hilabeteko espetxe zigorra ezarri zioten, auzitegi

korrekzionalean zein ere dei auzitegian. Auzia, kasazio gortearen eskuetan da gaur egun. Marseillako OM futbol klubaren konfuetako iruzurren kasuan, berriz, hiru urteko kartzela gatzigua eta erdia bete-beharrekoa ezarri zioten epaileek. Auzi-erabaki horri ere errekurtsioa jarri zion Tapien, eta dei epaitegian noiz aztertu zain dago. X

